

vici adjunctâ. Quæ autem pars utriusque adjungenda sit diœcesi, Patres sic exposuerunt: videtur utriusque diœcesis limitem incipere debere à flumine *Ohio* prope castellum *Massæ*, atque inde excurrere Septentrionem versùs, unâ cum finibus orientalibus Comitatum *Johnson, Franklin, Jefferson, Marion, Fayette, Shelby* et *Macon*; rectâ lineâ pergendo ad magna fluentia fluminis *Illinois* sita ad octo ferè millia passuum supra oppidum *Ottawa* in Comitatu *Lassalle*, et inde usque ad fines Provinciæ.

Cùm autem Apostolicæ litteræ, quibus aliquarum ex diœcesibus jam constitutis limites definiuntur, non suppetant, supplicandum Summo Pontifici censuerunt Præsules, ut supremâ suâ auctoritate limites suprâ designatos sanciret.

IV. Cùm ex litteris Eûm Cardinalis Præfecti Congregationis de Propagandâ Fide intellexerint Concilii Provincialis Patres gratissimum fore S. Congregationi in Concilio Provinciali tractari de methodo quâdam quæ servari semper debeat in commendandis Sedi Apostolicæ Sacerdotibus, ex quibus novus Episcopus eligatur:

Censuerunt Patres oportere ut Episcoporum totius provinciæ, immò Fœderatæ Americæ, donec altera erecta fuerit provincia Ecclesiastica, de singulis qui ad Episcopatum promovendi videantur, exquiratur sententia. Id autem facillimè fieri in Concilio Provinciali patet: quapropter Episcopis, quoties in Concilium congregantur, consulendum existimant, ut collatis inter se sententiis, idoneos et de Ecclesiâ benè meritos Sacerdotes, qui Sedes tum fortè vacantes impleant, proponant; sibi que etiam, si Coadjutoris operâ quis se indigere existimat, de eodem ex collegarum suffragiis et S. Sedis auctoritate provideant.

Ne autem contingat Sedem aliquam vacare dum nulla futura est copia proximè habendi Concilii, suadent Patres singulis Episcopis ut nomina trium quos idoneos judicent diœcesi regendæ, scripto mandata in scriniis suis servant, chartamque habeant sigillo munitam, exterius etiam ita notâ obsignatam, ut Vicarius Generalis eam, ipsis defunctis, transmittere possit; duplexque etiam ejusdem exemplum habendum, quorum unum ad Archiepiscopum, alterum ad Episcopum propinquiorem, vel ad seniorem ex duobus Episcopis propinquis mittatur. Scribet autem ad Archiepiscopum Episcopus propinquior, suasque animadversiones adjiciet: litteris autem illius Episcopi acceptis, vel, si neglexerit scribere, rationabili elapso tempore, scribet Archiepiscopus ad omnes Episcopos, ne propinquire quidem illo Episcopo excepto, et nomina illa cum suis animadversionibus transmittet, aliorum etiam nominibus adjectis, si illi quos Episcopus ante obitum designavit Archiepiscopo, ipsi haud idonei videantur. Post acceptas Archiepiscopi litteras, omnes Episcopi ad S. Congregationem scribent, suas sententias et suffragia de tribus illis, vel sex ad summum, exposituri. Vacante verò Sede Metropolitanâ, litteræ Vicarii Generalis ad seniorem Suffraganeum dirigendæ sunt, qui ad ceteros Episcopos, prout suprâ, scribet. Quòd si nulla charta nomina illa habens in scriniis defuncti Episcopi, vel aliàs reperiatur, Vicarius Generalis Episcopum propinquiorem, vel seniorem ex duobus propinquis, eâ de re statim monebit, ut Episcopus ille propinquior tria proponat nomina pari ratione ad Archiepiscopum et Episcopos ceteros, et ad S. Congregationem transmittenda. Quòd si neglexerit Episcopus propinquior intra tempus rationabile tria nomina propo-

nere, Archiepiscopus ipse ad Episcopos omnes scribet, tresque nominabit, de quibus Episcopi ad S. Congregationem suas sententias exponent.

In seligendis autem Sacerdotibus ad tantum gradum provehendis, sequentes regulas præ oculis habendas censuerunt Patres:

Nulli Episcopo invito dandum esse Coadjutorem, nisi collegarum iudicio S. Sedi probato, ipse Episcopus jam non sit regimini idoneus; Coadjutorem autem debere ab Episcopo cui datur seligi, collegis assentientibus: idcirco nomina tria eorum, ex quibus Episcopus Coadjutorem eligendum vult, ad Archiepiscopum et Episcopos ceteros, et ad S. Congregationem transmittet. Si autem intra tres menses post Episcopi obitum, Concilium Provinciale habendum sit, expectandum erit donec Patres convenerint, antequam ad S. Congregationem scribatur.

V. Censuerunt Patres saluti Indorum (qui extra Provincias Fœderatas et Territoria jam designata, atque omnium quæ hactenus erectæ sunt diœceson limites, constituendi sunt ex civilis potestatis auctoritate) prospiciendum, eorum curam Societati Jesu demandando: quapropter S. Sedem implorandam duxerunt, ut hæc ei Missio concedatur.

VI. Nigrorum etiam hominum, qui in Liberiam Africæ coloniam ex his regionibus migrant, saluti Patres consulendum ducentes, Apostolicam Sedem supplicant ut missio in eam regionem sub curâ Patrum Societatis Jesu instituat.

VII. Revm̄is Episcopis S. Ludovici et Bostoniensi munus à Patribus demandatum est concinnandi, et hujus Concilii nomine et auctoritate, in lucem edendi Ritualis Romani accuratam editionem, necnon ejusdem breve exemplar in usum Missionariorum; atque

utrisque editionibus, in modum appendicis, adjungendi modificationes hucusque à S. Sede concessas, unà cum versione, vernaculâ linguâ, eorum quæ prædictis Præsulibus vertenda esse visa fuerint.

VIII. Episcopis commendant Patres ut omni studio curent Seminaria in suis Diœcesibus, juxta Tridentinorum Patrum decreta, erigere; eamque, quatenus locorum adjuncta patiuntur, in omnibus sequi formam, quam ipsi Tridentini Patres præscribunt: Fidelium autem studium sæpius Episcoporum hortationibus accendendum duxerunt, ut eleemosynam in opus adeò Ecclesiæ profectui necessarium liberaliter conferant.

IX. Visum est Patribus munus seligendi, componendi vel corrigendi libros in Catholicorum collegiorum et scholarum præsertim usum, et ut ab omni errore contra fidem expurgati in lucem edantur curandi, committere Præsidibus, pro tempore existentibus, trium Collegiorum in Archidiœcesi Baltimorensi, nempe S. Mariæ Baltimorensis, S. Mariæ apud Montes, et Collegii Georgiopolitani. Sanxerunt etiam Patres ut hi libri cum approbatione duorum saltem ex Præsidibus prædictorum Collegiorum, atque ex auctoritate Archiepiscopi Baltimorensis, typis mandentur; operam omnem se adhibituros pollicentes ut in collegiis, scholis, et ubique apud Fideles, recipiantur.

X. Ne vagi, ignoti, pravique Sacerdotes sacra aggrediantur munera cum offensione Fidelium, revocandas esse facultates, quas communi quodam pacto Episcopi sibi invicem in Conventu anno 1810 habito largiti sunt, censuerunt Patres: ideoque in posterum neminem ex Sacerdotibus, vi illius pacti, posse jurisdictionem exercere, vel sacrum aliquod aggredi munus, absque Ordinarii auctoritate.

XI. Statuerunt Patres proximum Concilium Provinciale habendum esse Dominicâ tertiâ post Pascha, anno Domini 1837.

Hæc omnia nobis visa sunt, et consensu communi probata et firmata in Sessione solemni habitâ in Ecclesiâ Metropolitanâ Baltimorensi, die 27 Octobris anno Dñi 1833.

† Ego JACOBUS, *Arch. Balt. definiens subscripsi.*

† Ego JOANNES BAPTISTA MARIA, *Episcopus Mauricæstrensis, in partibus infidelium, et Coadj. Episcopi Bardensis, definiens subscripsi.*

† Ego JOANNES, *Episc. Carolopolitanus, definiens subscripsi.*

† Ego JOSEPH, *Episc. S. Ludovici, definiens subscripsi.*

† Ego BENEDICTUS, *Episc. Bostoniensis, definiens subscripsi.*

† Ego JOANNES, *Episc. Neo-Eboracensis, definiens subscripsi.*

† Ego MICHAEL, *Episc. Mobiliensis, definiens subscripsi.*

† Ego FRANCISCUS PATRIUS, *Episc. Arathen. in partibus infidelium, et Coadj. Episcopi Philadelphiensis, definiens subscripsi.*

† Ego FREDERICUS, *Episc. Detroitensis, definiens subscripsi.*

† Ego JOANNES BAPTISTA, *Episc. Cincinnatiensis, definiens subscripsi.*

Ego infrascriptus Secretarius Concilii Baltimorensis Provincialis secundi, testor Acta et Decreta supra memorata, juxta exemplar ab ipsis Præsullibus propriâ manu subscriptum, fuisse expressa, atque eidem in omnibus conformia reperiri.

E. DAMPHOUX.

## EPISTOLA

S. CONGREGATIONIS DE PROPAGANDA FIDE AD ARCHIEPISCOPUM BALTIMORENSEM.

ILLÛME AC REVÛME DOMINE,

PERSPICUUM novumque Amplitudo tua, et Episcopi Fœderatæ Americæ diœcesum ediderunt testimonium singularis quo præstant erga Religionem amoris, alterum Provinciale Concilium præterito mense Octobri Baltimori celebrando. Ea enim omnia, quæ ibi gesta ac statuta sunt, ex studio profecta esse intelliguntur, quo omnes incensi estis Ecclesiæ utilitatis procurandæ: SSÛmus Dñus Noster GREGORIUS PP. XVI, scriptis à se ad vos litteris suis, quas huic Epistolæ adjectas reperietis, id auctoritate suâ testatum voluit. Nunc meum est, S. Congregationis nomine, ad vos scribere, et vestræ virtuti iterum ex animo gratulari, et eos observantiæ sensus confirmare, quibus vos omnes de Religione optimè meritos jure prosequimur.

Venio autem ad ea quæ in Concilio illo pertractata, et Sedis Apostolicæ judicio à vobis subjecta sunt. Equidem arbitror jam ad Amplitudinem tuam pervenisse Sacræ Congregationis epistolam, die 17 Maii scriptam, quâ Brevia Apostolica continebantur de Sedis Episcopalis Vincennopolitanæ erectione, deque R. P. D. SIMONIS BRÛTË ad illum Episcopatum electione.

His litteris nunc adjectam accipies SSÛmi Dñi Nostri GREGORII PP. XVI Bullam Apostolicam, quâ Diœcesum omnium in Americâ Fœderatâ existen-

tium limites statuuntur. Ita omnis dubiorum occasio circa jurisdictionem à singulis Episcopis exercendam penitus auferetur.

Quod pertinet ad spiritualem curam gerendam Missionum ad Indos, qui extra Provincias Fœderatas et Territoria jam designata, atque omnium quæ hactenùs erectæ sunt Diœcesum limites, ex civilis potestatis auctoritate constitui debent, placuit S. Congregationi Patribus Societatis Jesu tale negotium esse committendum. Ita quoque placuit Nigrorum hominum, qui ex istis regionibus in *Liberiam* Africae coloniam migrant, spiritualem curam eidem Societati Jesu commendandam esse. Egimus utràque de re cum Rm̃o P. Societatis Jesu Generali Ministro, certumque habemus Patres Societatis omnem operam duros esse, ut vestra et S. Congregationis vota felicem exitum consequantur.

De methodo servandâ in istarum Diœcesum Episcopis eligendis, mitto ad Amplitudinem tuam decretum S. Congregationis jussu et auctoritate editum. Curabis ut ad singulos Fœderatæ Americae Episcopos ejusdem decreti exemplar mittatur, ut omnes in tam gravi negotio normam tenendam agnoscant.

Denique, ut par erat, amplissimis laudibus S. Congregatio prosequuta est initum ab Amplitudine tuâ et Episcopis collegis tuis consilium de novâ faciendâ Ritualis Romani editione, deque libris componendis qui ad institutiones philosophicas et theologicas tradendas in scholis adhibeantur. Erit verò S. Congregationi gratissimum tum Ritualis, tum librorum de quibus sermo est, exemplar, postquam editum fuerit, recipere.

Præcipua hæc sunt, quæ circa Ecclesiastica negotia in Concilio Baltimorensi Provinciali secundo per-

tractata, S. Congregationis nomine, tibi ceterisque Episcopis collegis tuis significare debebam. Reliquum est ut Amplitudini tuæ, ac memoratis RR. PP. DD. Episcopis Americae Fœderatæ fausta omnia precer, et Deum optimum maximum exorem, ut ad Ecclesiæ utilitatem vos omnes diù incolumes ac felices servet.

Romæ, ex Ædibus Sacræ Congregationis de Propagandâ Fide, die 26 Julii 1834.

C. M. CARD. PEDICINI, *Præf.*

A. MAIUS, *Secr.*

## BREVE EPISTOLARE

SS. DÑI NOSTRI GREGORII PP. XVI AD ARCHIEPISCOPUM  
BALTIMORENSEM ET EPISCOPOS EJUS SUFFRAGANEOS.

*Venerabilibus Fratribus Jacobo Archiepiscopo Baltimorensi, et ejus Suffraganeis.*

## GREGORIUS PAPA XVI.

Venerabiles Fratres, salutem et Apostolicam  
Benedictionem.

**P**ERLATÆ dudum ad nos fuerant Epistolæ vestræ, unâ cum decretis Concilii Provincialis proximo anno à vobis celebrati, quæ auctoritati nostræ Apostolicæ obsequentissimo, ut par erat, animo subjecistis. Hæc omnia expensa, nobis jubentibus, sunt à nostrâ Propagandæ Fidei Congregatione, quæ opportunum vobis dabit circa illa responsum. Accipietis simul Apostolicas nostras Litteras super nonnul-

lis eorum quæ statuistis, seu postulastis. Verùm et volumus nostrum erga vos studiosissimum animum hac item Epistolâ declarare. Siquidem ex memoratâ Synodo, atque ex iis quæ ad nos hac occasione scripsistis, mirificè confirmata est quæ de vestro pro Dei honore, animarumque salute spectatissimo zelo, et singulari erga communem omnium Ecclesiarum matrem ac magistram Romanam Sedem obsequio nobis jamdiù insita erat existimatio; eoque ipso auctam in nobis sensimus caritatem illam, quâ Fraternitates vestras effusè in Domino prosequabamur. Pergite itaque, ut facitis, Venerabiles Fratres; et quoniam justorum semita crescit usque ad perfectam diem, urgete alacriori quotidie sedulitate saluberrimam talentorum negotiationem, quæ est de animabus Christo lucrandis; vigilate super creditas vobis Dominicæ vineæ partes, plantate, rigate, in spe ac patientiâ; nihil quidem vestris tribuentes viribus, sed omnia ad Ejus gloriam referentes, qui operatur in vobis et velle et perficere pro bonâ voluntate. Ita de fructu pastoralis curæ in multorum salutem amplificato gaudebitis, ac per bona opera certam vestram vocationem et electionem facientes, uberrimam accipietis in æternitate mercedem. Ad nos quod attinet, persuasum habetote, Venerabiles Fratres, auctoritatem et studia nostra nunquam, quantum cum Domino poterimus, esse vobis defutura: ac Fraternitatibus vestris novam semper virtutem ex alto implorantes, pignus nostræ præcipuæ benevolentiae Apostolicam benedictionem, cum creditis etiam fidei vestræ ovibus communicandam, peramanter impertimur.

Datum Romæ apud S. Petrum, die 23 Aprilis anno 1834, Pontificatûs nostri anno quarto.

## BULLA APOSTOLICA

SS. DNI NOSTRI GREGORII PP. XVI, QUÆ DIÆCESUM IN FÆDERATIS AMERICÆ SEPTENTRIONALIS PROVINCIIS LIMITES STATUUNTUR.

GREGORIUS EPISCOPUS,

SERVUS SERVORUM DEI.

Ad perpetuam rei memoriam.

**B**ENEDICTUS Deus cujus misericordiæ non est numerus, et bonitatis infinitus est thesaurus. Nos quidem amaritudinibus undique affici, ac fluctibus sine intermissione jactari permittit, animo tamen despondere non patitur, gaudiisque interdum spiritualibus dignatur cor nostrum reficere ac dilatare, ut alacriores effecti Apostolicæ sollicitudinis curas ad remotissimas quoque orbis regiones impensè conferamus, et quidquid orthodoxæ fidei dilatationi, Pastorum tranquillitati et recto Christifidelium regimini aptius congruere conspicimus, id Apostolicâ quâ fungimur auctoritate statuamus et decernamus.

Nobis sanè quo felici successu Catholicæ Religionis negotia in Provinciis Fœderatis Americæ Septentrionalis progredierentur, jam tum planè innuit, cum in minoribus constituti, Congregationi Propagandæ Fidei operam nostram, prius Consultoris officio, dein Cardinalis Præfecti munere impendere-mus. Postquam verò ineffabili Dei bonitate, nullisque nostris suffragantibus meritis, ad Ejus vices in terris gerendas qui gloriosus regnat in cœlis, vocati fuimus, lætiora etiam et indubia de sacrosanctæ Ca-